



Pranuar / Dorezuar Prilijeno/Prilato Received/Delivered	28.08	3	viti god year
Organ /Njësia Organ /Jedinica Org./Unit	Nr Prot Br Prot Prot No	Shtojca Prilog Appendix	Sasia Kolicina Quantity
SKOMSHOK	5837	2023	1/6



Republika e Kosovës Republika Kosova – Republic of Kosovo

KËSHILLI I PAVARUR MBIKËQYRËS PËR SHËRBBIMIN CIVIL TË KOSOVËS
NEZAVISNI NADZORNI ODBOR CIVILNE SLUŽBEKOSOVA
INDEPENDENT OVERSIGHT BOARD FOR THE CIVIL SERVICE OF KOSOVO

A.nr.945/202

Këshilli i Pavarur Mbikëqyrës për Shërbimin Civil të Kosovës - Kolegji për Shqyrtimin dhe Vendosjen e Ankesave në përbërje nga: Ardita Haxhnikaj-Demi, kryetare; Jeton Koca dhe Eshref Shabani, anëtarë; me Ardita Perçuku-Shyti-Zyrtare e lartë për bashkëpunim profesional, në cilësinë e procesmbajtëses, ka shqyrtuar ankesën me numër A.nr.945/2023, të datës 11.07.2023, të parashtruar nga ankuesi **“ë cilin me autorizim e përfaqëson avokat nga Prishtina, kundër organit të punësimit: Agjencia e Statistikave të Kosovës, në çështjen juridike “Transfer” duke vepruar në pajtim me nenin 6 paragrafin 1 nën paragrafin 1.1, nenin 16 paragrafi 3 dhe nenin 18 paragrafin 1 nën paragrafin 1.6 të Ligjit Nr.06/L-048 për Këshillin e Pavarur Mbikëqyrës për Shërbimin Civil të Kosovës dhe Rregulloren Nr.02/2018 për Procedurën e Shqyrtimit dhe Vendosjes së Ankesave në Këshillin e Pavarur Mbikëqyrës për Shërbimin Civil të Kosovës, në seancën për këshillim dhe votim të mbajtur më datë 25.08.2023, njëzëri mori këtë:**

V E N D I M

- I. **Shfuqizohet** Vendimi me Nr.01-03-795, i datës 07.07.2023, dhe Vendimi me Nr.01-838-2023, i datës 18.07.2023, të Kryeshefit Ekzekutiv të Agjencisë së Statistikave të Kosovës dhe **çështja kthehet në rishqyrtim dhe rivendosje te organi i njëjtë.**
- II. **Obligohet** Kryeshefi Ekzekutiv i Agjencisë së Statistikave të Kosovës, që brenda afatit prej pesëmbëdhjetë (15) ditësh nga dita e pranimit të këtij vendimi, të ndërmer të gjitha veprimet e nevojshme ligjore për zbatimin e këtij vendimi, sikurse në pikën I të dispozitivit dhe të veproj në pajtim me pikëpamjet juridike si në arsyetimin e këtij vendimi.
- III. Këshilli i Pavarur Mbikëqyrës për Shërbimin Civil të Kosovës, duhet të njoftohet me shkrim pas ndërmarrjes së veprimeve në pajtim me këtë vendim.

A r s y e t i m

Nëpunësi civil **“ (tutje vetëm ankuesi), më datë 11.07.2023, ka parashtruar ankesë në Këshillin e Pavarur Mbikëqyrës për Shërbimin Civil të Kosovës, e regjistruar nën shenjen A.nr.945/2023, kundër Vendimit Nr.01-03-795, të datës 07.07.2023, të Kryeshefit Ekzekutiv të Agjencisë së Statistikave të Kosovës, e plotësuar me datë 27.07.2023, duke atakuar edhe Vendimin**

me Nr.01-838-2023 të datës 18.07.2023 të Kryeshefit Ekzekutiv të Agjencisë së Statistikave të Kosovës, lidhur me plotësim ndryshimin e Vendimit me numër protokoll 01-03-795 të datës 07.07.2023, me pretendimin se vendimet e atakuar janë vendime arbitrare, të nxjerra në kundërshtim me legjislacionin dhe parimet themelore të shërbimit civil, duke u bazuar në situatë fiktive dhe derivojnë nga një proces i anuluar nga KPMSHCK-ja.

Këshilli i Pavarur Mbikëqyrës për Shërbimin Civil të Kosovës (*tutje Këshilli*), bazuar në dispozitat e Rregullores Nr.02/2018 për Procedurën e Shqyrtimit dhe Vendosjes së Ankesave, me datë 13.07.2023 ka proceduar kërkesën për përgjigje në ankesë të Agjencia e Statistikave të Kosovës, ndërsa, kjo e fundit, më datë 17.07.2023, ka përcjell përgjigjen në ankesë, së bashku me shkresat lidhur me çështjen në procedurë.

Kolegji për Shqyrtimin dhe Vendosjen e Ankesave ka administruar këto prova: Ankesën me numër protokoll 5111/2023, të datës 11.07.2023, e parashtruar nga ankuesi në Këshillin e Pavarur Mbikëqyrës për Shërbimin Civil të Kosovës; Vendimin me Nr.01-03-795 të datës 07.07.2023 të Kryeshefit Ekzekutiv; Formularin për vlerësimin e rezultateve në punë të datës 02.02.2023; Ankesën e ankuesit të datës 24.03.2023 e parashtruar në KPMSHCK; Raportin vjetor për kontratat e nënshkruara publike të datës 09.02.2023; Raportin për aktivitetet e prokurimit të datës 31.01.2023; Vendimin A.nr.557/2023 të datës 23.05.2023 të KPMSHCK-së; Formularin për vlerësimin e rezultateve në punë të datës 02.06.2023; Planin vjetor të përmirësimit të rezultateve në punë të datës 07.07.2023; Ankesën e ankuesit për harmonizimin e koeficientit të datës 06.03.2023 tek organi i punësimit; Akt emërimit e ankuesit me Nr.04-112-199 të datës 30.03.2012 së bashku me përshkrimin e detyrave të punës; Komunikimet elektronike të datës 15.12.2022, 30.12.2022, 23.12.2022, 15.12.2022, 12.01.2023, 24.01.2023, 27.02.2023, 01.03.2023, 16.03.2023 ndërmjet ankuesit dhe nëpunësve brenda organit të punësimit si dhe personave gjegjës të përfshirë të tjerë; Shkresën zyrtare lidhur me planifikimin përfundimtar të prokurimit të datës 16.03.2023; Komunikimet elektronike të datës 16.03.2023, 12.04.2023 ndërmjet ankuesit dhe personave gjegjës; Lëndën e kontratës me Nr.01-02-277 të datës 20.03.2023; Kërkesën për tenderim të sigurimit fizik të objektit të ASK-së të datës 21.02.2023; Komunikimet elektronike të datës 18.04.2023, 13.04.2023 ndërmjet ankuesit dhe personave gjegjës të organit të punësimit; Vendimin me Nr.01-02-405 të datës 18.04.2023 për caktimin e Komisionit për vlerësimin, ekzaminimin dhe krahasimin e tenderit; Raportin e vlerësimit të tenderëve të datës 10.05.2023 së bashku me shkresat e bashkangjitura për rastet konkrete; Njoftimin mbi vendimin e autoritetit kontraktues të datës 12.05.2023 së bashku me shkresat e bashkangjitura për rastin konkret; Kërkesën për rishqyrtim të datës 17.05.2023; Vendimin e datës 18.05.2023 nga ASK-ja; Komunikimin elektronik të datës 15.05.2023 të ankuesit dhe personave gjegjës; Shkresën zyrtare me Nr.04-02-590 të datës 30.05.2023 lidhur me identifikimin e autoritetit kontraktues; Kërkesën për inicimin e aktivitetit të prokurimit për sigurimin fizik të objektit të ASK-së të datës 30.05.2023; Komunikimin elektronik të datës 29.05.2023 ndërmjet ankuesit dhe nëpunësit brenda organit të punësimit; Shkresën zyrtare me Nr.01-02-775 të datës 30.06.2023 lidhur me identifikimin e autoritetit kontraktues; Komunikimin elektronik të datës 29.06.2023 ndërmjet ankuesit dhe nëpunësit brenda organit të punësimit; Shkresat zyrtare lidhur me ftesat për tenderim të datës 30.05.2023 dhe 30.06.2023; Procesverbalin e datës 18.04.2023 lidhur me hapjen e tenderit; Vendimin me Nr.01-02-418 lidhur me caktimin e komisionit të vlerësimit të ri tenderit të datës 27.04.2023; Komunikimet elektronike të datës 26.04.2023, 24.04.2023, 18.04.2023, 31.05.2023, 19.05.2023 ndërmjet ankuesit dhe nëpunësit brenda organit të punësimit; Shkresën zyrtare të datës 19.05.2023 lidhur me zgjatjen e afatit shtesë prej 20 ditësh për rivlerësim të ri tenderit;

Komunikimin elektronik të datës 19.05.2023 ndërmjet ankuesit dhe nëpunësit brenda organit të punësimit; Vendimin me Nr.01-02-662 të datës 05.06.2023 lidhur me mbi shkarkimin e komisionit nga ZKA dhe caktimin e Komisionit të Vlerësimit të Ri tenderit për ekzaminim dhe krahasim; Komunikimet elektronike të datës 05.06.2023, 31.05.2023, 19.05.2023, 05.06.2023, 31.05.2023 ndërmjet ankuesit dhe personave gjegjës; Vendimin me Nr.01-02-681 të datës 07.06.2023 lidhur me zëvendësimin e dy anëtarëve nga ZKA dhe caktimin e Komisionit për vlerësimin e ri tenderit për ekzaminim dhe krahasim; Komunikimet elektronike të datës 07.06.2023, 05.06.2023, 05.06.2023, 20.06.2023, 19.06.2023, 16.06.2023, 12.06.2023 ndërmjet ankuesit dhe personave gjegjës; Shkresën zyrtare lidhur me raportin e vlerësimit të tenderëve të datës 26.06.2023 së bashku me shkresat e bashkangjitura të raportit në fjalë; Njoftimin mbi vendimin e autoritetit kontraktues të datës 22.06.2023; Komunikimet elektronike të datës 21.06.2023, 26.06.2023 ndërmjet ankuesit dhe personave gjegjës; Kërkesën për rishqyrtim të datës 26.06.2023; Vendimin e datës 29.06.2023 nga ASK-ja; Komunikimet elektronike të datës 06.07.2023 të ankuesit dhe personave gjegjës; Shkresën zyrtare me Nr.01-02-497 të datës 10.05.2023 lidhur me identifikimin e autoritetit kontraktues; Kërkesën me Nr.06-416-2023 të datës 27.04.2023 lidhur me rekrutimin e stafit të DRA tek Zyra regjionale e ASK-së; Komunikimin elektronik të datës 26.04.2023 ndërmjet udhëheqëses së personelit, ankuesit dhe personave gjegjës; Njoftimin për kontratë të datës 22.03.2023; Lëndën e kontratës të datës 04.07.2023; Komunikimet elektronike të datës 04.07.2023, 27.06.2023, 23.06.2023, 22.06.2023, 16.03.2023 ndërmjet ankuesit dhe personave gjegjës; Lëndën e kontratës me Nr.01-02-772 të datës 30.03.2023; Shkresën zyrtare të datës 06.06.2023 lidhur me arsyeshmërinë për ri tenderimin për angazhimin e tre konsulentëve; Kërkesën e datës 07.06.2023 për pranimin e një konsulenti profesional në divizionin e çmimeve; Kërkesën e datës 07.06.2023 për pranimin e një konsulenti profesional në divizionin e statistikave të bujqësisë; Kërkesën e datës 12.06.2023 për rekrutim të stafit në zyrën e burimeve njerëzore; Kërkesën e datës 06.06.2023 për angazhimin e stafit (një konsulenti për GIS) për përgatitjen e bazës hartografike për regjistrim të popullsisë; Komunikimet elektronike të datës 27.02.2023, 24.02.2023; Autorizimin e përfaqësuesit të datës 08.07.2023; Plotësimin e ankesës së ankuesit të datës 27.07.2023; Kërkesën për përgjigje në ankesë të datës 13.07.2023 nga Këshilli i Pavarur Mbikëqyrës për Shërbimin Civil të Kosovës; Përgjigjen në ankesë të datës 17.07.2023 nga Agjencia e Statistikave të Kosovës së bashku me shkresat e bashkangjitura të lëndës; Kontratën e ankuesit me numër ESK-5/005 të datës 12.03.2002; Përgjigjen në ankesë të datës 18.07.2023 nga Agjencia e Statistikave të Kosovës së bashku me shkresat e bashkangjitura të lëndës; Vendimin me Nr.01-838-2023 të datës 18.07.2023 nga zv.Kryeshafi Ekzekutiv i ASK-së; Vërejtjen me shkrim me Nr.01-384-2023 të datës 07.04.2023 e shqiptuar ndaj ankuesit nga udhëheqësi i tij i drejtpërdrejtë; Shkresën zyrtare me Nr.01-793-2023 të datës 07.07.2023 lidhur me transferimin e përkohshëm të ankuesit; Shkresën zyrtare me Nr.01-799-2023 të datës 07.07.2023 lidhur me planin vjetor të përmirësimit të rezultateve në punë;

Kolegji i Këshillit duke u bazuar në vlerësimin e hollësishëm të çdo prove veç e veç dhe të gjitha provave të marra së bashku, si dhe bazuar në rezultatin tërësor të shqyrtimit administrativ, ka vlerësuar që lënda e ankuesit sipas ankesës me numër A.nr.945/2023 të kthehet në rishqyrtim dhe rivendosje të organi i njëjtë, *sepse*:

Nga analizimi i shkresave të lëndës rrjedhë se ankuesi është i punësuar në Agjencinë e Statistikave të Kosovës (me tej ASK), dhe së i njëjti sipas Aktit të Emërimit me Nr:04-112-19,9 të datës 30.03.2012, është emëruar në pozitën e Shefit të Prokurimit, në Departamentin e Administratës.

Me tej, nga provat e lëndës rezulton së më datë 07.07.2023, Kryeshefi Ekzekutiv i ASK-së, ka miratuar Planin vjetor të përmirësimit të rezultateve në punë për ankuesin, ndërsa përmes shkresës me Nr.01-793-2023 të datës 07.07.2023, ka kërkuar nga Menaxherja e Personelit nxjerrjen e vendimit për transferimin e ankuesit në Departamentin e Statistikave të Bujqësisë, në pozitën zyrtar i lartë për statistika të bujqësisë dhe mjedisit, në kategorinë profesionale (profesional 1). Po në të njëjtën ditë, Kryeshefi Ekzekutiv i ASK-së, duke u bazuar në nenin 52 paragrafin 1 nën paragrafin 1.2 të Ligjit Nr.06/L-114 për Zyrtarët Publikë, ka nxjerrë Vendimin me numër protokolli 01-03-7925, për transferimin e ankuesit, ku sipas pikës I të dispozitivit është vendosur që ankuesi të transferohet nga pozita e Menaxherit të Prokurimit në Departamentin e Bujqësisë dhe Mjedisit në të njëjtën kategori dhe koeficient dhe atë nga data 07.07.2023, me arsyetimin se i njëjti në bazë të vlerësimit vjetor për vitin 2022 ka treguar performancë jo të mjaftueshme për të udhëhequr me njësinë e prokurimit të këtij institucioni.

Tutje, me datë 18.07.2023, Kryeshefi Ekzekutiv i ASK-ka nxjerrë Vendimin me Nr.01-838-2023 për plotësimin dhe ndryshimin e Vendimit Nr.01-03-795 të datës 07.07.2023 dhe atë sa i përket pikës I të vendimit paraprak duke e plotësuar me të dhënat lidhur me atë se ankuesi nga pozita e Menaxherit të Prokurimit transferohet përkohësisht në Departamentin e Bujqësisë dhe Mjedisit, në të njëjtën kategori dhe koeficient nga data 07.07.2023 deri me datën 06.10.2023 dhe pas kësaj periudhe i njëjti të kthehet në vendin e tij të punës.

Ankuesi në ankesën e parashtruar në Këshillin e Pavarur Mbikëqyrës për Shërbimin Civil pretendon se vendimet e atakuara janë vendime arbitrare, të nxjerra në kundërshtim me legjislacionin dhe parimet themelore të shërbimit civil, duke u bazuar në situatë fiktive dhe derivon nga një proces i anuluar nga KPMSHCK-ja. Shton se Vendimi me Nr.01-03-795, i datës 07.07.2023 përmban këto shkelje dhe atë se: nuk është përcaktuar afati kohor për transferimin e nëpunësit civil dhe nuk janë respektuar kriteret ligjore për realizimin e transferimit të nëpunësit civil, vendimi cenon parimin kushtetues të sigurisë juridike dhe parimin e pritshmërisë së ligjshme dhe të arsyeshme, arsyetimi i vendimit është dukshëm i pamjaftueshëm dhe në kundërshtim me dispozitat e legjislacionit në fuqi si dhe këshilla juridike është në kundërshtim me legjislacionin në fuqi dhe nuk e udhëzon palën siç kërkohet me LPPA dhe LZP, si dhe se vendimi në fjalë përmban të meta të konsiderueshme dhe si i tillë është në kundërshtim me dispozitat gjegjëse kushtetuese dhe ligjore.

Në funksion të shqyrtimit të ligjshmërisë së vendimeve të kundërshtuara me ankesë, Kolegji i Këshillit ka analizuar dispozitat e Ligjit Nr.06/L-114 për Zyrtarët Publikë referuar procedurës së transferimit të përkohshëm të nëpunësve civilë, përkatësisht nenit 52 me të cilin përcaktohet se: "1. Nëpunësi civil mund të transferohet përkohësisht në një pozitë tjetër të Shërbimit Civil të së njëjtës kategori, në këto raste: 1.1. kur është në interes të institucionit, deri në 6 muaj gjatë 2 vjetëve; 1.2. për përmirësimin e rezultateve të vetë nëpunësit, deri në 3 muaj gjatë 2 vjetëve; 1.3. për arsye të përkohshme shëndetësore në bazë të vendimit të komisionit kompetent, sipas ligjit, për aq sa është e nevojshme, sipas vendimit të komisionit përkatës. 2. Transferimi mund të bëhet: 2.1. brenda institucionit ku është emëruar, duke përfshirë këtu edhe degët e tij lokale; 2.2. në një agjenci ekzekutive të institucionit ku është emëruar; 2.3. në një institucion tjetër të Shërbimit Civil. 3. Nëpunësi civil mund të refuzojë transferimin në këto raste: 3.1. kur gjendja e tij shëndetësore, provuar me vërtetim mjekësor, e bën transferimin të pamundur; 3.2. nëse vendi ku transferohet gjendet më shumë se 100 km nga vendbanimi i nëpunësit civil. 4. Nëpunësit civil, i cili transferohet në një vend tjetër pune me kërkesën e institucionit, në një lokacion tjetër, i cili është më i largët se sa vendi i tij i punës, i kompensohen shpenzimet e udhëtimit nga institucioni, i cili e transferon nëpunësin. 5. Nëpunësi civil,

gjithashtu, mund të transferohet përkohësisht, për nevojat e institucionit apo shtetit, në një organizatë ndërkombëtare, në të cilën Republika e Kosovës është anëtare apo në një institucion ndërkombëtar. 6. Në përfundim të afatit të transferimit, nëpunësi civil kthehet në pozitën e mëparshme. 7. Qeveria, me propozimin e ministrisë përgjegjëse për administratën publike, me akt nënligjor, miraton rregullat e hollësishme për transferimin e përkohshëm sipas këtij neni.”

Po ashtu, Kolegji mori parasysh edhe dispozitat e Rregullores (QRK) Nr.14/2020 për Transferimin e Nëpunësve Civilë, konkretisht të nenit 6 sipas të cilit është përcaktuar se: *“1. Nëpunësi civil mund të transferohet për përmirësimin e rezultateve të tij në bazë të planeve vjetore për përmirësim të rezultateve në punë brenda institucionit dhe institucioneve të administratës shtetërore. 2. Transferimi bëhet me kërkesë të nëpunësit ose të mbikëqyrësit të drejtpërdrejtë e cila miratohet nga njësia përgjegjëse. 3. Plani vjetor për përmirësim të rezultateve në punë, në kuptim të paragrafit 1 të këtij neni është plani i transferimeve të përkohshme në rast të nevojës së institucionit ose nëpunësit civil për përmirësimin e rezultateve në punë”.*

Rrjedhimisht, në kuptim të kuadrit ligjor si më sipër, Kolegji ka analizuar vendimet e kundërshtuara me ankesë dhe si rrjedhojë ka konstatuar se Vendimi Nr.01-03-79, i datës 07.07.2023 dhe Vendimi 01-838-2023, i datës 18.07.2023, të Kryeshefit Ekzekutiv të ASK-së, lidhur me transferimin e përkohshëm të ankuesit për përmirësim të rezultateve të punës, nuk janë nxjerrë në pajtueshmëri me kërkesat ligjore, ngase sipas Vendimit Nr.01-03-795 të datës 07.07.2023 ankuesi është transferuar nga pozita e Menaxherit të Prokurimit në Departamentin e Bujqësisë dhe Mjedisit, pa precizim të pozitës në të cilën është bërë transferimi i tij si dhe pa saktësim të periudhës kohore të transferimit, përkatësisht sipas vendimit Nr.01-03-795 i datës 07.07.2023, ankuesi transferohet në kategori të njëjtë dhe koeficient të njëjtë nga data 07.07.2023. Ndërsa, me Vendimin Nr.01-838-2023 të datës 18.07.2023 është përcaktuar periudha e transferimit të ankuesit dhe atë nga data 07.07.2023 deri me 06.10.2023, mirëpo, nuk përcaktohet pozita në të cilën është bërë transferimi i ankuesit.

Në kontekst të konstatimit si më lartë, Kolegji bazuar në Akt emërimin me Nr.04-112-199, të datës 30.03.2012, ka vërtetuar se ankuesi është emëruar dhe ushtron pozitën e Menaxherit të Prokurimit në ASK, e cila pozitë në kuptim të nenit 12, të Rregullores (QRK) Nr.10/2022 për Klasifikimin e Vendeve të Punës në Shërbimin Civil, hynë në klasat dhe emërtesat e pozitave të punës të **kategoriisë së ulët drejtuese**, kurse, pozita për të cilën është propozuar transferimi i ankuesit sipas kërkesës së datës 07.07.2023, është Zyrtar i Lartë për Statistika të Bujqësisë dhe Mjedisit, e cila pozitë në vështrim të nenit 13 të kësaj rregullore hynë në klasat dhe emërtesat e pozitave të punës së **kategoriisë profesionale**, kështu që, nisur nga ky fakt rezulton se transferimi i ankuesit nga pozita e punës si Menaxher i Prokurimit në pozitën e Zyrtarit të Lartë për Statistika të Bujqësisë dhe Mjedisit, bie ndesh me dispozitat e nenit 52 paragrafit 1 të Ligjit Nr.06/L-114 për Zyrtarët Publikë sipas të cilit përcaktohet se: *“1. Nëpunësi civil mund të transferohet përkohësisht në një pozitë tjetër të Shërbimit Civil të së njëjtës kategori...”* e po ashtu edhe në kundërshtim me nenin 4 paragrafin 1 të Rregullores (QRK) Nr.14/2020 për Transferimin e Nëpunësve Civilë sipas të cilit përcaktohet se: *“1. Nëpunësi civil mund të transferohet përkohësisht në një pozitë tjetër të shërbimit civil të së njëjtës kategori brenda dhe jashtë institucionit të administratës shtetërore dhe institucionit tjetër shtetëror sipas rasteve të përcaktuara në nenin 52. paragrafin 1 të Ligjit”.* Përkatësisht, nisur nga ky përcaktim ligjor, Kolegji konstaton se transferimi i përkohshëm për arsye të përmirësimit të rezultuarve në punë mund të bëhet vetëm në kategori të njëjtë.

Po ashtu, bazuar në provat materiale të kësaj çështje, rrjedhë se, kërkesa lidhur me transferimin e ankuesit është bërë nga vet Kryeshefi Ekzekutiv i ASK-së, si mbikëqyrës i drejtpërdrejtë i ankuesit, dhe po ashtu i njëjti ka nxjerrë edhe vendimin për transferimin e ankuesit, veprime këto në kundërshtim të plotë me nenin 6 paragrafin 2 të Rregullores (QRK) Nr.14/2020 për Transferimin e Nëpunësve Civilë me të cilin është përcaktuar se: "2. Transferimi bëhet me kërkesë të nëpunësit ose të mbikëqyrësit të drejtpërdrejtë e cila miratohet nga njësia përgjegjëse". Rrjedhimisht, në kuptim të nenit 14 të Ligjit Nr. 06/L-114 për Zyrtarët Publikë, njësi përgjegjëse konsiderohet Njësia për Menaxhimin e Burimeve Njerëzore, andaj, mbi këtë bazë, Kolegji konstaton se transferimi i ankuesit sipas kërkesës së mbikëqyrësit të ankuesit duhet të miratohet nga Njësia e Burimeve Njerëzore të ASK-së.

Duke qenë se vendimet e kundërshtuara me ankesë, gjegjësisht, Vendimi me Nr.01-03-797 i datës 07.07.2023 si dhe Vendimi me Nr.01-838-2023 të Kryeshefit Ekzekutiv të ASK-së, përmbajnë të meta të tilla të cilat pamundësojnë vendosjen meritorë lidhur me këtë çështje juridiko-administrative, Kolegji i Këshillit vlerësoi që kjo çështje ankimore të kthehet në ri-shqyrtim dhe rivendosje tek organi kompetent, me detyrimin që i njëjti të rishqyrtoj rastin e ankuesit dhe të nxjerrë vendim në pajtim me legjislacionin në fuqi, duke marrë parasysh pikëpamjet juridike të dhëna nga Kolegji i Këshillit.

Keshtu që pas shqyrtimit dhe analizimit të të gjitha shkresave të lëndës si dhe duke u bazuar në nenin 6 paragrafin 1 nën paragrafin 1.1, nenin 16 paragrafin 3 dhe nenin 18 paragrafin 1 nën paragrafin 1.6 të Ligjit Nr.06/L-048 për Këshillin e Pavarur Mbikëqyrës për Shërbimin Civil të Kosovës, Kolegji i Këshillit vendosi si në dispozitiv të këtij vendimi.

Këshillë juridike: Vendimi hyn në fuqi ditën e nënshkrimit nga Kryetarja e Kolegjit. Kundër vendimit të Këshillit, pala e pakënaqur e cila pretendon se vendimi i Këshillit nuk është i ligjshëm mund të iniciojë konflikt administrativ në Gjykatën Themelore në Prishtinë-Departamenti për Çështje Administrative, brenda afatit prej tridhjetë (30) ditësh nga dita në të cilën i është dorëzuar vendimi. Inicimi i konfliktit administrativ nuk e ndalin ekzekutimin e këtij vendimi.

KËSHILLI I PAVARUR MBIKËQYRËS PËR SHËRBIMIN CIVIL TË KOSOVËS

Lënda me numër A.nr.945/2023.

Ardita Perçuku-Shyti

Procesmbajtëse

Ardita Haxhnikaj-Deçi

Kryetare e Kolegjit



Vendimi i dërgohet:

- Përfaqësuesit me autorizim të ankuesit
- Kryeshefit Ekzekutiv në Agjencinë e Statistikave të Kosovës;
- Udhëheqëses së Burimeve Njerëzore në Agjencinë e Statistikave të Kosovës dhe
- Arkivit të KPMSHCK-së.